

Meje Po Carte Juan Copiya Tatina, Pomonae Jesucristo Pejume Cowantsiwi Tatinatsi. Barapo Carte Peopi Carucuae Carta.

*Meje yabara po diwesi xua pon naca
ajuntuyapusya exana*

¹ Pacata yabara tinatsi pon pewen “Pejume”, baraichi, pon jiwi ajuntuyapusya exainchi. Bapon asu caena bayatha poxonae Nacom abu cataunxuae jopa exanaeyo wanacua. Poxonae bapon naexana wanacuatha, bapoxonae bexa poxonae bapon cueicueije diwesi bara bapoxonae barapon pajume tan. Barapon bara yatsicaya patan. Yawa bapon bara pacobe jayabeiban.

² Barapo peajuntuyapuswa Nacom exana, po peajuntuyapuswa xua ataya tsiteca, xua pata yabara yaputaewa baxua. Barapon Nacom Pexanto tatsi xeina barapo peajuntuyapuswa, matautano patan barapon. Daxota yabara paca tsipaebatsi bapon. Yawano daxota yabara paca tsipaebatsi barapo peajuntuyapuswa xua bapon xeina, pon Paxatha peecaexae. ³ Paca tsipaebatsi xua bayatha patan yawa xua pajume tanno, caemonae painya naexanaenexa paxantha, peburaya wajume cowantsixae Jesucristo. Icha paxan paichin xua Nacomtha Waxatha caemonae panaexanan yawa

Pexantotha pon Jesucristo, bara paichinderu.
4 Daxota bara po coyenein pacata tinatsi xua bichocono pata tajuntu coyene weiweinaewa tsane.

Meje yabara xua Nacom pexainyei juntu coyene peyacuiya jinaein

5 Po diwesi Jesucristo pana cuiduba barapo diwesi xuya paca tsipaebatsi xua Nacom pexainyei juntu coyene peyacuiya jinaein. Bapon jopa xeinaeyo peacuirube coyenewa pejuntu coyenewatha, tsipei bapon bichocono pejuntu coyene xeicaein. 6 Icha jeichichi: “Waxainchi Nacom yawa jinompatsi, be caemonae peburaya nacayawa jinompatsi Nacomtha”, jeichichi, daichitha caena poxonaе saya abe exanatsi, bapoxonaе saya apara naerabatsi xua pocotsiwa wapaebiwa baxua, yawa naerabatsi xua exanatsi. Matautano jopa yawa muxuna jinompaetsi Nacom pia pexainyei coyenewa tatsi. 7 Ichitha icha cajinompaetsipatsi Nacom Pejume Diwesi wajuntu coyeneintha yawa xua exanaetsipatsi pocotsiwa xua Nacom ichichipa bara nexata peburaya caemonae naexanatsi. Jesucristo jana pichapabarena poxonaе tupa, pon Nacom Pexanto tatsi. Barapon pon Nacom Pexanto tatsi petupaexae naetotha, daxota Nacom naca juntu coyene wejuntemaina exana daxita abe waexanae cuiru coyenein.

8 Icha jeichichi: “Jopa abe taexanaewa”, jeichichi, apara bara wacoutha namuxujainyabatsi pocotsiwa wapaebixae. Matautano wajuntu coyeneintha jopa xeinaetsi pexainyei coyenewa.

⁹ Ichitha icha Nacomtha yabara tsipaebatsi xua abe waexanaewa, xua jeichichi: “Nacom auran yaitama abe exanan”, jeichichi, bapoxonae Nacom naca jũntũ coyene wejũntemaina exana abe waexanae cuiru coyenein xua daxita naca wexuba. Baxua Nacom exana, tsipei bapon yabara barũ jume cui cowũntatsi xua peexanaewa tsane pocotsiwa pepaebiwa. Mataũtano tsipei bapon bara xaniwaichiya peexanaein. ¹⁰ Icha jeichichi: “Jopa abe exanaetsi”, jeichichi, apara bara yabara jume cuiya exanatsi xua Nacom pon jiwi pemuxutorobin, tsipei Nacom naca yabara jei: “Barapomonae abe peexanaewi”, naca yabara jei. Yawano Nacom Pejume Diwesi jopa xeinaetsi wajũntũ coyeneintha.

2

Meje yabara xua Cristo pon wanaca yabara jume yawenaein Nacomtha

¹ Pomonae be tamonae tapaca canatsico-taewichi pam, irũ painya nejume cowũntsixae Jesucristo, yabara pacata tinatsi barapo coyene xua abe painya neexanaeyainwa. Daichitha icha waxainchi abe exanatsi barapara waxainchi nantaũtatsi Jesucristo pon wanaca yabara jume yawenaein Nacomtha xua Paxathaxae. Bapon mataũta jũntũ coyene xanepanaya peexanaein. ² Barapon Jesucristo petũpaexae naca yantomata daxota Nacom naca capanepa abe waexanae cuiru coyenein weya. Jopa meisa waxainchi nexa apara bara irũ daxita barapo cae pin

nacuanthapiwi tatsitupatsi abe pia peexanae cuiru coyenein tatsi.

³ Icha jume cowantsiya exanatsi pocotsiwa Nacom pia peitorobi jume diwesitha paeba, nexata bara yaputainchi, xua bara xaniwaicha waya-putaewaba Nacom. ⁴ Icha ichan jei: “Xan Nacom yaputan”, jei, xua daichitha jopa exanaeyo pocotsiwa Nacom pia peitorobi jume diwesi paeba, apara bapon pon jiwi pemuxuitorobin, yawa pejantũ coyenewatha jopa xeinaeyo pexainyei coyenewa. ⁵ Seicaya nama pon exana pocotsiwa xua Nacom itoroba pon waxainchi jiwanatsi, nexata bara yaputainchi xua bapon xanepanaya antobe Nacom. Daxota waxainchi nayaputainchi xua bara peburũya caemonae nacayawa jinompatsi Nacomtha. ⁶ Pon xua jei: “Nacom yawa poponan, caemonae peburũya nacayawa poponan Nacom”, jei, bapon bewa yajuntũ coyene wũnaeya poponae, icha bayatha Jesucristo ichi xua bapon beta xanepanaya yajuntũ coyeneya popona.

Meje yabara xua Nacom pia pena peitorobi diwesi jume

⁷ Tamonae pam pomonae bichocono tapaca caantobewichi pam, irũ painya nejume cowantsixae Jesucristo, anoxuae pacata tinatsi barapo peitorobi diwesi xua jopa pena diwesiyo, tsipei caena bayatha barapo diwesi paxeiname poxonae aena pajume cowantame. Barapo peru itorobi diwesi jume caena bayatha pajume taneme. ⁸ Ichitha po diwesi xua anoxuae pacata tinatsi, barapo diwesi be pena diwesi naexana. Barapo peitorobi diwesi Cristo bara

tsita pexainyei diwesichi, irurũ paxam paca tsita pexainyei diwesi jume. Tsipei jiwi, copitha jopa yaputaeyo barapo Nacom pia pena peitorobi coyenewa tatsi ichaxota xua jei: “Nantiya pana naantobeinde”, jei. Icha be pocotsi coyeneya jũta ichi poxonaе jiwi jopa beta taeyo poxonaе quirei. Ichitha anoxuae jiwi yaputane barapo Nacom pia pena peitorobi coyenewa tatsi daxota bara itacũpatsi xua xanepanaya pejinompaewa, icha be pocotsi coyeneya jũta ichi poxonaе jiwi beta jinompa mataqueitha.

⁹ Icha ichũn jei: “Xan Nacom yaputan”, jei, xua daichitha ita aenae-aeneya caseba nawita pontha xua irũ jume cowũntarũ Cristo, bapon apara cataunxuae jopa yaputaeyo Nacom. ¹⁰ Pon antobe pontha xua irũ jume cowũntarũ Cristo, bapon apara jame yaputane Nacom. Daxota bapon jopa exanaeyo po coyenein xua abe peexanaewa xua irũ ichamonae peexanaewa tsane. ¹¹ Ichitha pon ita aenae-aenei pontha xua irũ jume cowũnta Cristo, bapon acuicoyenebeya popona be pocotsin jopa yaputaeyo Nacom. Bapon jopa xanepanaya poponaeyo, icha be pocotsi coyene jũta ichi poxonaе pon peitata nacũtsin catsawa pona poxoru jopa xapain taeyo.

¹² Pomonae pexui pam, pacata tinatsi tsipei Nacom paca jũntũ wejũntemaina exana abe painya neexanae cuiru coyenewan xua Jesucristo painya nejume cowũntsixaе. ¹³ Pomonae pinyon pam, pacata tinatsi tsipei payaputaneme Nacom, pon Waxa, pon ataya pepoponaеin, pon copiya popona poxonaе aena daxita forota. Pomonae pe-wowi jiwi pam, pacata tinatsi, tsipei caurimonae

pia pentacaponaein tatsi paamanayabame pox-
onae paca jũntũ coyene jũjũta xua abe painya ne-
exanaewam tsane.

¹⁴ Pomonae pexui pam, pacata tinatsi, tsipei
payaputaneme Nacom, pon Waxa. Pomonae
pinyon pam, pacata tinatsi tsipei payaputaneme
Nacom, pon ataya popona, pon copiya popona
poxonae aena daxita forota. Mataũtano pewowi
jiwi pam, pacata tinatsi tsipei bichocono
paaĩũntũcoyenesũm, yawano xanepanaya
pajume cowũntame Nacom Pejume Diwesi,
mataũtano tsipei pajũntũ coyene amanayabame
caurimonae pia pentacaponaein tatsi.

¹⁵ Jopa bichocono paichichipaeinde pocotsiwa
xua abe po cae pin nacuathe. Mataũtano
jopa bichocono pacayabara nanta xeinaeya
ichichipaeinde xuan pocotsiwan xeina pomonae
jopa pejume cowũntsiwi pomonae jinompa po
cae pin nacuathe. Icha ichũn saya ichichipa
bichocono xua xuan xeina pomonae jopa pejume
cowũntsiwi bapon jopa apara antobeyo Nacom,
pon Waxa. ¹⁶ Penasi cui tatae coyene Nacom
jopa itorobiyo xua barapo cae pin nacuathe
tsique nexa. Apra pomonae jopa pejume
cowũntsiwi pia coutha exana barapo penasi cui
tatae coyene. Mataũtano Nacom jopa itorobiyo
xua abeya peichichipae coyene xua peuwiya
tae coyene. Mataũtano Nacom jopa itorobiyo po
coyenein xua peaebe coyenein ichamonaetha, xua
pexeinaexae copei. Barapocotsi coyenein Waxa
Nacom werena jopa pichipaeyo. Saya apra
pomonae jopa pejume cowũntsiwi pia coyene
tatsi. ¹⁷ Barapo cae pin nacue weraweracaena,

yawano muxuna weraweracaena xua xuan abe peexanae cuiru coyenein. Ichitha pon exana pocotsiwa Nacom ichichipa bapon jame ataya poponaena Nacomtha.

Meje xua pexainyeiwa yabara, yawa xua pe-naerabiwa yabara

¹⁸ Pomonae pexui pam, bara nama imoxoyo tsane po matacabi Nacom daxita weraweraca exanaena barapo cae pin nacua. Bayatha pajume taneme xua jei: “Imoxoyo patopaena pon Cristo pia peaitafaetabinchi”, jei. Ichitha bayatha pata pinmonae, pomonae Cristo pia peaitafaetabiwichi. Daxota yaputainchi xua bara nama imoxoyo tsane po mataqueitha Nacom weraweraca exanaena barapo cae pin nacue. ¹⁹ Barapomonae pomonae Cristo pia peaitafaetabiwichi copiya naca bar_u nacaetuta poxonae nacaetuteibatsi, ichitha anoxuae bara weya naca wepu pona. Icha xaniwaicha barapomonae waxainchi jiwana tsi-paetsi metha awiya cataunxuae naca bar_u nacaetuta dubenanaebiyaetsipa. Barapomonae waxainya weya pona, xua daxota jiwi taena xua barapomonae bara jopa wamonae jiwiyo xua jopa pejume cowantsi jiwixae Cristo.

²⁰ Ichitha paxam Cristo paca cata Nacom pia Pejumope tunax_u tatsi pia painya nepaca bar_u jinompaenexa. Daxota paxam daxita yabara paca yaputane exana pexainyei coyenewa.

²¹ Paxam pacata tinatsi tsipei payaputaneme xua pexainyeiwa. Icha jopa payaputaetsipaem baxua, jopa pacata tinaetsipaetsi. Paxam payaputaneme pon ba xua xaniwaicha pepaebin

jopa ba naerabiya paebiyo. ²² ¿Jintam pon pemuxuitorobinda? Pon xua jei: “Jesús apara Mesías aibi, pon Nacom itoroba”, jei, bapon apara pon pemuxuitorobin. Bapon Cristo pia peaitafaetabi jitontsi tsipei jume matawenta poxonae jiwi paeba xua pinae Cristo Nacom Pexanto tatsi xuano xua Nacom Cristo Paxa tatsi. ²³ Pomonae xua Nacom Pexanto tatsi jume itawetatsi xua pejume cowantsiwa, barapomonae jopa nantaatsiyo Nacomtha xua be Paxa tatsi. Ichitha pon Nacom Pexanto tatsi xanepanaya yabara paebatsi, xua jei: “Jesús apara Mesías pon Nacom itoroba”, jei, jame bapon nantaata Nacom be Paxa tatsi.

²⁴ Daxota painya juntu coyeneintha pajume xeinare Nacom Pejume Diwesi xua bayatha pajume taneme poxonae aena pajume cowantame. Ichá painya juntu coyeneintha pajume xeiname xua pajume taneme bayatha, nexata bapoxonae pebuxya caemonae pana naexanaename Pexanto tatsitha yawa coxiyantha, xua Nacomtha. ²⁵ Matautano Jesucristo yabara naca tsiwinae muxu duta, naca jei: “Peajuntayapuswa paca catinchi po peajuntayapuswa xua ataya tsiteca”, naca jei.

²⁶ Yabara pacata tinatsi barapo coyenein pomonae xua painya nepaca muxujainyabiwa.

²⁷ Ichitha paxam Nacom pia Pejumope tñaxa tatsi paxeiname, po pejumope tñaxa tatsi paca cata Jesucristo. Bapoxonae jopa nantawenonaeyo xua ichamonae paca cuiduba poxoru barapo Nacom pia Pejumope tñaxa tatsi paca cuiduba daxita coyenein. Po coyenein Nacom pia

Pejumope t̃nax̃ tatsi paca cuiduba baraxua pexainyeiwa, matautano jopa pemuxutorobiwa. Bara paichinde caemonae pebur̃ya pana naexande Cristotha, icha Nacom pia Pejumope t̃nax̃ tatsi ichi xua yabara paca cuiduba xua po coyene painya neexanaewa tsane.

²⁸ Pomonae pexui pam, ant̃b̃s̃ya caemonae pebur̃ya pana naexande Cristotha xua jopa wajuwinexa xua poxona bapon patopaetsica barapo cae pin nacuathe. Yawa caemonae pana naexande Cristotha xua jopa waaura tsane barapon peitabaratha xua abe waexanaexae poxona patopaetsica. ²⁹ Bayatha payaputaneme xua Jesucristo pon j̃nt̃ coyene xanepanaya peexanaein. Barichi bewa payaputaename pomonae j̃nt̃ coyene xanepanaya peexanaewi, barapomonae barapara Nacom pia pexui tatsi.

3

Meje yabara xua Nacom pia pexuimonaetsi

¹ Maisa Nacom Waxa jopa juniya naca antobeyo. Daxota Nacom copata xua naca yabara jei: “Nacom pia pexui tatsi”, naca yabara jei. Jopa jume, bara barapomonaetsi. Daxota barapo cae pin nacuepiwi jopa naca yaputaeyo xua Nacom pia pexuimonaetsi, tsipei barapomonae jopa bayatha yaputaeyo Nacom. ² Pomonae tapaca caantobewichi pam xua ir̃ painya nejume cow̃ntsixae Nacom, waxainchi bara Nacom pia pexuimonaetsi. Anoxuae cataunxuae jopa nayaputaetsi

xua bexa tsane eta po coyeneya naca cana ex-
 anaena. Ichitha yaputainchi xua poxonaes Je-
 sucristo patopaetsica, waxainchi naexanaeinchi
 icha barapon jüta coyeneya ichi. Tsipei bapon
 bara yatsicaewa taeinchi. ³ Pomonaes Jesucristo
 wünaes ewatatsi xua pepatopae wünaes, bara-
 pomonaes najüntü coyene xanepana exana, xua
 jopa xeinaeyo peabe coyenewa, icha Jesucristo
 ichi xua bichocono pejüntü coyene xanepanaein
 xua jopa xeinaeyo peabe coyenewa.

⁴ Daxita pomonaes abe peexanaewi,
 barapomonaes Nacom yabara paebina xua
 penatsicuentsiwa abe peexanaexae bapontha.
 Tsipei poxonaes abe exana taacoibichi xua
 exana pocotsiwa Nacom pia peitorobi diwesi
 jume paeba. ⁵ Paxam payaputaneme xua

Jesucristo patopeica barapo cae pin nacuathe,
 wanaca jüntü coyene jüntemaina exanaenexa
 abe waexanaes cuiru coyenein. Mataütano
 payaputaneme xua bapon jopa abe exanaeyo.

⁶ Daxita pomonaes pebürya caemonaes naexana
 Cristotha, barapomonaes jopa abe exana
 dubenanaebiyaeyo. Ichitha nama pomonaes
 abe exana dubenanaebiya, barapomonaes jopa
 Jesucristo yaputaetsi, mataütano jopa pijimonaes
 tatsichi. ⁷ Pomonaes pexui pam, jopa pacopatsinde
 xua bara ichamonaes paca muxujainyabina.
 Pon ba xanepana exana bapon ba bichocono
 pejüntü coyene xanepanaein, icha Jesucristo
 ichi xua bichocono pejüntü coyene xanepanaya
 exanaein. ⁸ Ichitha pon ba xua abe exana
 ducuaenabiya, apara bapon ba caurimonaes
 pia pentacaponaein tatsi pijimonaes jiwanapin

tatsi. Tsipei caena bayatha, poxonaе aena Nacom daxita forota, caurimonaе pia pentacaponaein tatsi bapon abe peexanaein. Nacom Pexanto tatsi patopeica xua cana coyene weraweraca peexanaenexa caurimonaе pia pentacaponaein tatsi pia coyenewan tatsi.

⁹ Pomonaе Nacom pia pexui tatsi barapomonaе jiwana dapon ba aibi pon ba abe exana ducua-naebiya, tsipei bapon yajuntа cui coyeneya popona Nacom pia cui coyenewa tatsi. Bapon jopa itacupaetsi xua abe exana ducua-naebiya tsipei Nacom pia pexui tatsi jiwanapin tatsi.

¹⁰ Daxota yaputainchi pomonaе Nacom pia pexui tatsi, matautano yaputainchi pomonaе caurimonaе pia pentacaponaein tatsi pia pexui tatsi. Yabara yaputainchi pomonaе jopa xanepanaya exanaeyo, barapomonaе jopa Nacom pia pexui tatsi. Matautano yabara yaputainchi pomonaе jopa antobeyo ichamonaе pomonaetha pomonaе irа pejume cowuntsiwi, barapomonaе jopa Nacom pia pexui tatsi.

Meje yabara xua poxonaе jei: “Caemonaе peburaya bara nantiya naantobe tsainchi”, jei

¹¹ Poxonaе aena pajume cowantame, xua beya anoxuae, pajume taneme Nacom Pejume Diwesi. Barapo diwesitha jeye: “Caemonaе peburaya bara nantiya naantobe tsainchi”, jei barapo diwesitha.

¹² Waxainchi jopa bewa naexanaetsi icha ichi pon pewan Caín, pon caena bayatha tupa. Bapon Caín caurimonaе pia pentacaponaein tatsi pia jiton tatsi. Bapon peweicho bexuba. ¿Eta xua metha Caín peweicho bexuba? Caín peweicho uwiya

bexuba, tsipei pocotsiwa Caín exana Nacom nexa, Nacom tsita abetsi. Ichitha nama pocotsiwa Caín peweicho tatsi exana Nacom nexa baxua jame Nacom tsita xanepanatsi.

¹³ Tamonae pam, pomonae iru painya nejume cowantsixae Jesucristo. Painya xoba panantu exabame icha ichamonae paca ita aenae-aenei pomonae jinompa po cae pin nacuathe, pomonae jopa pejume cowantsiwi. ¹⁴ Waxainchi yaputainchi xua

bewa werapaeinchi abe waexanaexae. Ichitha anoxuae peajuntu yapuswa xeinatsi, po peajuntu yapuswa ataya tsiteca waantobexae pomonaetha pomonae iru pejume cowantsixae. Pon xua jopa antobeyo piamonae jiwanapin tatsi, pon iru pejume cowantsin Nacom, bapon bequein popona ichitha jopa xeinae tsane peajuntu yapuswa. ¹⁵ Pon ita aenae-aeneya

caseba ichamonae pomonaetha pomonae iru pejume cowantsiwiru Nacom, bapon Nacom tsitatsi be pon jiwi pejutebin. Payaputaneme xua pon jiwi pejutebin bapana jopa xeinae peajuntu yapuswa pejuntu coyenewatha, po peajuntu yapuswa ataya tsiteca. ¹⁶ Waxainchi

yabara yaputainchi xua Nacom wanaca antobewa, tsipei Jesucristo naca tsitapa naetotha wanaca antobexae. Daxota bewa copatinchi xua bara ichamonae naca atene exanaena, xua bequein beya poxonae tupa naca exanaena ichamonae nexa pomonae iru pejume cowantsiwiru. ¹⁷ Pebin ba xeina

nawita xuan pocotsiwa ba nantawenona xua junte ma popona penaexanaewa tsane. Bapon

cui tane pia jiton pon iru pejume cowantsindu Nacom xua pon jopa xeinaeyo pocotsiwa nantawenona. Icha bapo pebin jopa pia jiton yabara nantanuweya nanta xeinaeyo xua peyawenaenexa, barapo pebin apara jopa Nacomtha tsita xeinaeyo peantobewa, po peantobewa Nacom xeina jiwi nexa. ¹⁸ Tamonae pam, pomonae iru painya nejume cowantsixae Jesucristo. Jopa bewa saya ichamonaetha jeichi: “Paca antobetsi”, jopa bewa saya jeichi, poxona jopa yawenaetsi barapomonae. Jame bewa xaniwaicha yawenaetsi barapomonae, bapoxona jame yatsicaewa antobe tsainchi barapomonae.

Meje yabara xua wajume cowantsiya jinom-paewa Nacomtha

¹⁹⁻²⁰ Poxona yawenatsi ichamona bapoxona yaputainchi xua bara xeinatsi po coyene pexainyei coyenewa. Xaniwaicha yaputainchi xua Nacom ichichipa pocotsiwa waxainchi exanatsi, bara bequein wajuntu coyene naca jei: “Jamaisa jopa beta exanaem”, bequein naca yabara jei. Waxainchi yaputainchi xua Nacom bichocono ainya cui, beyacaincha wajuntu coyene poxona abe naca yabara paeba, tsipei Nacom daxita yaputane. ²¹ Tamonae pam, paxam pomonae tapaca caantobe jiwichi pam, painya nejume cowantsixae Jesucristo. Bequein wajuntu coyene jopa abeya naca yabara jeiyo: “Jamaisa jopa beta exanaem”, jopa jeiyo, daxota awiya Nacom jume cowantatsi xua waexanaewa pocotsiwa Nacom ichichipa. ²² Yawa Nacom naca

cata pocotsiwa wacatsi wajume cowantsixaetsi pia peitorobi diwesi jumein tatsi, yawano poxoru waexanaexae pocotsiwa Nacom ichichipa. ²³ Yawa Nacom pia peitorobi diwesi jume naca itorobiya jeye: “Taxanto Jesucristo pajume cowande, yawa nantiya pana naantobeinde”, naca jei. ²⁴ Daxita pomonae ba exana pocotsiwa Nacom pia peitorobi diwesitha paeba, barapomonae Jesucristo yawa jinompa, barichi barapomonae Jesucristo baru jinompatsi. Waxainchi yaputainchi xua bapon naca yawena ducuaenaebiya, tsipei nanajumope cata waxantha wanaca cuidubinexa barapo coyene.

4

Meje yabara xua Nacom pia Pejumope tñaxñ tatsi, irñ pomonae Jesucristo abe peyabara paebi-wichi

¹ Tamonae pam, pomonae tapaca caantobe ji-wichi pam, irñ painya nejume cowantsixae Jesucristo. Jopa pajume cowantsinde xua daxita pomonae paca jei: “Paxan Nacom peitorobi jume pata paebiwi pan”, paca jei. Jame maisa pajure saya barapomonae painya neyaputaenexa barapomonae icha metha bara Nacom itoroba barapomonae. Tsipei barapo cae pin nacuathepiwi jiwi ayei pomonae penaerabiwi, pomonae jei: “Paxan Nacom peitorobi jume pata paebiwi pan”, jei. ² Ichitha paca itacupa xua payaputaneme pomonae xeina Nacom pia Pejumope tñaxñ tatsi. Icha barapomonae paca jei: “Nacom Pexanto tatsi, pon Jesucristo, pepa jiton naexana barapo cae pin nacuathe”, jei, bapoxonae payaputaneme

xua barapomonaē apara Nacom pia Pejumope t̃nax̃ tatsi yawa jinompa. ³ Icha ichamonaē paca jei: “Nacom jopa itorobiyo Pexanto barapo cae pin nacuathe xua penaexanaenexa pepa jiton pew̃n Jesús”, paca jei, bapoxonaē paxam payaputaneme xua barapomonaē ba jopa yawa jinompaeyo Nacom pia Pejumope t̃nax̃ tatsi. Barapomonaē ba seicaya xeina icha pejumope t̃nax̃ po jumope t̃nax̃ Cristo ita aenae-aeneichi. Paxam bayatha pajume taneme xua barapo pejumope t̃nax̃ bewa patopaetsica po cae pin nacuathe tsique. Bara xainyei bara bayatha barapo jumope t̃nax̃ patopa po cae pin nacuathe tsique.

⁴ Tamonaē pam, paxam Nacom pijimonaē tatsi pam. Paxam pacui coyene amanayabame barapo penaerabi jiwitha. Tsipei po pejumope t̃nax̃ paca yawa popona xua Nacom pia Pejumope t̃nax̃ tatsi, barapo pejumope t̃nax̃ bichocono peayapus̃ itorobiya coyenewa pexeinaein, beyacaincha po pejumope t̃nax̃ po cae pin nacuathepiwi j̃nt̃ coyene itoroba dubenanaebiyatsi xua abe peexanaenexa. ⁵ Barapo jiwi apara barapo cae pin nacuathepiwi, daxota barapomonaē yabara cueicueijei pocotsiwan barapo cae pin nacuathe xeina. Ichamonaē ir̃ pomonaē po cae pin nacuathepiwixae barapo coyene baxuan jume naitaewatsiya exana. ⁶ Ichitha waxainchi Nacom piamonaetsi. Pomonaē Nacom yaputainchi, barapomonaē bara naca jume naitaewata. Ichitha nama pomonaē jopa Nacom yaputaetsi, barapomonaē jopa naca jume naitaewatsiyo. Daxota naca itac̃pa xua wayaputaewa pomonaē

cueicueijei pexainyei jume. Matautano naca itacupa xua wayaputaewa pomonae cueicueijei pemuxuitorobi jume.

Meje yabara xua Nacom peyawa cui jinaein xua bichocono peantobe coyenewa

⁷ Tamonae pomonae tapaca caantobewichi pam, iru painya nejume cowantsixae Nacom. Bewa waxainchi nantiya naantobe tsainchi. Tsipei barapo peantobe coyenewatha Nacom naca cana exana xua waxeinaewa waantobe coyenewa. Daxita pomonae xua antobe ichamonae apara barapomonae bara Nacom pia pexui tatsi naexana. Matautano barapomonae bara Nacom yaputainchi. ⁸ Nacom ba peyacuiya jinaein peantobe coyenewa. Daxota pon jopa tsita xeinaeyo ichamonae peantobe coyenewa apara poxoru jopa yaputaeyo Nacom, tsipei Nacom peyacuiya jinaein peantobe coyenewa. ⁹ Poxonae Nacom Pexanto itoroba Nacom naca tsita ituta pia peantobe coyenewa. Nacom Pexanto itoroba pon yatsicaya compa tatsi, barapo cae pin nacuathe tsique waxeinaenexa tsane peantuyapusawa, po peantuyapusawa ataya tsiteca. ¹⁰ Barapo yatsicaewa pepa peantobe coyenewa meje baxue: Poxonae ba Nacom antobetsi, baraxua ba jopa pepa peantobe coyenewiyo. Jame ba Nacom naca antobe baraxua ba jame yatsicaewa pepa peantobe coyenewa. Poxoru Nacom itorobica Pexanto wanaca wejantemaina exanaenexa abe waexanae cuiru coyenein. Barapo coyene jame yatsicaewa pepa peantobe coyenewa.

¹¹ Tamonae, pomonae tapaca caantobe jiwichi pam, iru painya nejume cowantsixae Nacom. Tsipei Nacom bichocono naca antobe, daxota xuya waxainchi bewa nantiya naantobe tsainchi. ¹² Dapon ba aibi pon bayatha Nacom tainchi. Ichitha icha waxainchi nantiya naantobe tsainchi, bapoxonae Nacom naca yawa poponaena. Nacom beta xaniwaichiya cana exana pia peantobe coyene wajuntu coyene berena. ¹³ Waxainchi natsita itapeinya xeinatsi, xua bara Nacom yawa jinompatsi, yawa xua Nacom naca yawa popona, tsipei Nacom nanajumope tunaxu cata waxantha. ¹⁴ Paxan patan Jesucristo poxonae Nacom Pexanto itorobica. Daxota pajan: “Bara xainyei xua Nacom Pexanto itorobica, xua barapon pecapanenebiyaenexa po cae pin nacuathepiwi xua abe pia peexanae cuiru coyenein weya tatsi”, pajan. ¹⁵ Pon ba xua jeye: “Bapon Jesús Nacom Pexanto tatsi”, jei, bapon apara bara yawa popona Nacom, iru Nacom yawa popona bapon.

¹⁶ Daxota waxainchi Nacom yaputainchi, yawa jume cowantatsi xua xaniwaicha bara Nacom naca antobe. Nacom apara pon peyanthathaya jinaein xua pocotsiwa bichocono peantobe coyenewa. Pon xua bichocono antobe ichamonae, bapon apara bara yawa popona Nacom, iru Nacom yawa popona bapon. ¹⁷ Daxota waxainchi yabara nacuiduba dubenanaebiyatsi xua bichocono peantobe coyenewa. Poxonae matabi tsuxubi tsane po mataqueitha Nacom jiwi yabara paebina xua penatsicuentisiwa Nacomtha, barapo matabitha jopa junuwi tsainchi. Jume

cowantınchi xua Nacom jopa wanaca yabara pae-biwa tsane xua abe waexanaexae. Icha Jesu-cristo ichi xua jopa abe exana ducuaenaebiayeyo poxona poxona po cae pin nacuathe, waxainchi barapocotsi coyeneya ichichi poxona jinompatsi po cae pin nacuathe. ¹⁸ Poxona antobetsi ichamonae barapo jantı coyenewatha ba jopa cunuwichi barapomonae. Tsipei barapo peantobe coyenewatha torotatsi pocotsiwa xua pejunuwiwa xua wajantı coyene weya. Tsipei pon junuwa nayaputane xua atene tsaneba, penayaputaexae xua abe exana. Pon ba junuwa jopa xeinaeyo peantobe coyenewa, po peantobe coyenewa Nacom weya.

¹⁹ Waxainchi daxota Nacom antobetsi tsipei bapon copiya pewanaeya naca antobe. ²⁰ Icha pebin jei: “Xan Nacom antobein”, jei, xua dai-chitha caena ita aenae-aeneya caseba pia jiton pontha xua ırı jume cowantarı Nacom, apara barapo pebin pon jiwi pemuxuitorobin. Icha jopa antobeyo pia jiton pon peyaitaexae, barichi bapon jopa antobeyo Nacom pontha xua jopa yaitaeyo. ²¹ Nacom nacata itoroba pia peitorobi diwesi jume. Barapo diwesitha naca jeye: “Pon ba xua Nacom antobetsi, bapon ba bewa muxuna antobe tsane pia jiton pontha xua ırı jume cowantarı Nacom”, naca jei barapo diwesitha.

5

Meje yabara poxona xua waxainchi jantı coyene amanayabatsi pomonae jopa pejume cowantsiwi

¹ Pon ba bichocono tsita xeina pejume cowuntsiwa Jesús pon xua jei: “Jesús apara bara bapon pon Nacom itorobica, pon Mesías jeichichi”, jei, bapon jame Nacom Pexanto tatsi naexana. Daxita pomonae antobe Nacom xua paxatha, barichi barapomonae muxuna antobe Nacom pia pexui tatsi pomonae iruru pejume cowuntsixae. ² Poxonae waxainchi Nacom antobetsi xuano exainchi pocotsiwa Nacom pia peitorobi coyenewantha itoroba, bapoxonae yaputainchi xua bara antobetsiru Nacom pia pexui tatsi. ³ Poxonae Nacom antobetsi, bapoxonae jume cowuntsiya exanatsi pocotsiwa paeba Nacom pia peitorobi diwesi jumeintha. Nacom pia peitorobi diwesi jumein jopa ayapubeyo xua yabara jume cui cana exana. ⁴ Daxita pomonae Nacom piamonae tatsi, barapomonae juntu coyene amanayaba pontha pon jiwi juntu coyene itorobatsi po cae pin nacuathepiwi xua abe peexanaewa tsane. Wajume cowuntsi coyenewa Nacomtha, barapo coyenewatha naca yawena xua wajuntu coyene amanayabiwa pontha pon jiwi juntu coyene itorobeibatsi po cae pin nacuathepiwi xua abe peexanaewa tsane. ⁵ Saya pomonae jame jume cowanta, xua pejeiwa: “Jesús apara Nacom Pexanto tatsi”, jei, jame barapomonae juntu coyene amanayaba bapontha pontha pon jiwi juntu coyene itorobeibatsi po cae pin nacuathepiwi xua abe peexanaewa tsane.

Meje yabara xua po diwesi Nacom Pexanto tatsi yabara

⁶ Bapon Jesucristo patopeica po cae pin nacuathe tsique. Poxonae bapon bautisabatsi, yawa poxonae naetotha tupa exanatsi, xua poxonae jana pichapabarena, barapo naxobe cui coyenebe naca yaputane exana xua bapon Jesucristo, apara bara Nacom Pexanto tatsi. Saya meisa jopa naca yaputane exanaeyo xua poxonae bautisabatsi, bara yawa iru naca yaputane exana xua poxonae naetotha tupa exanatsi, yawa xua poxonae jana pichapabarena. Nacom pia Pejumope tunaxu tatsi yabara paeba daxita baxua. Barapo Nacom pia Pejumope tunaxu tatsi bara xaniyeya pepaebin. ⁷ Nacom naca yaputane exana xua Jesucristo bara Nacom Pexanto tatsi poxonae cueicueijei acoibi po jumeyobe peitaboco wetsica. ⁸ Barapo jume apara poxonae Nacom naca tsipaeba wajuntu coyenewatha. Yawano barapo jume po jume xua cueicueijei poxonae Jesús bautisabatsi. Yawano barapo jume po jume xua cueicueijei poxonae bara nama imoxoyo tupaena Jesús. Barapo acoibi jumeyobe peburaya cuita caunuta xua jei: “Bapon Jesús apara Nacom Pexanto tatsi”, jei. ⁹ Ba jume cowantatsi po jumein jiwi paeba. Ichitha po jume nama Nacom Pexanto yabara paeba, barapo jume jame bichocono peainya cui jume, beyacaincha po jumein xua jiwi paeba. Daxota bewa jume cowantichi po coyene xua Nacom Pexanto yabara paeba. ¹⁰ Pon ba Nacom Pexanto tatsi jume cowantatsi, bapon ba pia juntu coyenewa tsipaebatsi xua bara bapon ba Jesucristo yatsicaewa Nacom Pexanto tatsi. Pon jopa Nacom jume cowantichi, bapon nanta xeina xua

Nacom naeraba xua pon jiwi pemuxuitorobin, tsipei bapon jopa jume cowantsiyo po coyene Nacom Pexanto yabara paeba. ¹¹ Barapo jume, po jume Nacom Pexanto yabara paeba, barapo jume wajuntu coyenewatha jume tainchi, naca jeye: “Nacom peajuntu yapuswa naca cata po peajuntu yapuswa ataya tsiteca, po peajuntu yapuswa Nacom Pexanto tatsi pia xainya werena tapichapatsi”, jei barapo jume. ¹² Pon ba Nacom Pexanto tatsi yawa popoinchi, bapon xeina barapo peajuntu yapuswa. Ichitha pon Nacom Pexanto tatsi, jopa yawa poponaetsi, bapon jopa xeinaeyo barapo peajuntu yapuswa, po peajuntu yapuswa ataya tsiteca.

Meje yabara poxonae Juan muxu tsipaeba, poxonae imoxoyo nacobe weta xua tina

¹³ Pacata tinatsi paxam, pomonae pajume cowantame, Nacom Pexanto tatsi. Po coyenein xua pacata tinatsi, apara xua painya neyaputaenexa xua bara paxeiname peantu yapuswa, po peantu yapuswa xua ataya tsiteca.

¹⁴ Waxainchi bichocono yabara jume cowantatsi Nacom xua wanaca yawenaewa tsane. Tsipei yaputainchi poxonae wucatsi pocotsiwa Nacom ichichipa, bapoxonae Nacom bara naca jume tane pocotsiwa yabara xua wawucaexae.

¹⁵ Tsipei yaputainchi xua Nacom naca jume tane poxonae wucatsi, daxota yaputainchi xua bara xeinatsi pocotsiwa wucatsi Nacom.

¹⁶ Icha taneme xua ichun abe exana pon iru jume cowanta, xua ichitha pocotsiwa bapon exana jopa tupa naexanaeyo, bapoxonae Nacomtha

tawꞥcare bapon. Bapoxonae Nacom cana exana xua bapon xeina peantꞥyapusꞥwa. Ichitha icha jiton abe exana pocotsiwa xua tꞥpa naexana jopa catsipaebichi xua Nacomtha tawꞥcame bapon.

¹⁷ Daxita pocotsiwan jiwi abe exana daxita baxuan Nacom tsita abetsi. Daichitha barapo abe peexanae coyene jiwana xua icha abe peexanae coyenewa barapo abe peexanae coyene jopa tꞥpa naca cana exanaeyo.

¹⁸ Yaputainchi pon yawa popona Nacom xua pia Paxaxae, bapon jopa exanae ducuanabiyayeo abe peexanae cuiru coyenein, tsipei Nacom Pexanto tatsi yawena xua bapon yawenatsi. Mataꞥtano caurimonae pia pentacaponaein tatsi jopa itacꞥpaetsi xua bapon peitorobiwatsi xua abe peexanaewa tsane. ¹⁹ Yaputainchi xua bara Nacom piamonae tatsichi, yawa yaputainchi xua caurimonae pia pentacaponaein tatsi itoroba daxita po cae pin nacuathepiwi xua abe peexanaewa tsane. ²⁰ Yaputainchino xua Nacom Pexanto tatsi bayatha patopeica barapo cae pin nacuathe, yawa naca tsipaeba Nacom Pejume Diwesi wayaputaenexa Nacom, pon pexainyein. Mataꞥtano yawa jinompatsi Nacom Pexanto tatsi, pon pexainyein, pon Jesucristo. Barapo Nacom pexainyein pon naca cata peantꞥyapusꞥwa, po peantꞥyapusꞥwa xua ataya tsiteca. ²¹ Tamonae pam, jopa pajume cowꞥntsinde ibo nacomꞥn.

Baja Juan.

**Nacom Pejume Diwesi po diwesi pena jume
diwesi xua Jesucristo yabara tinatsi
New Testament in Cuiba**

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
e9c4c3a0-6dec-54a4-aaba-fb395e5eddc7